


明世學山

士



廉矩一卷

海鹽沂陽王文祿世廉

太初心廉章第一

粵維大道一元至清作渾闢宰莫齡莫增廉之心也
欲無斯靜乃見真性天無欲陰陽平地無欲剖柔明
人無欲仁義精廉也者湛性之澄也浮天疑地誕育
萬物感受命厥廉是故宅廉惟聖達廉惟睿索廉惟
息息之息之廉幾研乎遙觀厥廉求上古觀上古求
太初觀太初求無初神而靈微之貞檢朴無欲故無
爭夫無欲者廉之清也無爭者廉之直也無初者廉
之源也帝舜曰直哉維清孔子曰人之生也直

廉理大統章第二

夫廉也者約衆理而統同之也譬則五色之白五味之甘五聲之宮其實無體其名無窮誠廉之確仁廉之純義廉之毅禮廉之履樂廉之豫智廉之知勇廉之強遇君見忠遇親見孝遇長見弟遇幼見慈朋友見信夫嬾見別由貌曰恭由言曰從由視曰明由聽曰聰由情曰和由性曰中由心曰思由息曰睿由睿曰聖蹈之爲道得之爲德正之爲政罰之爲刑賚之爲賞煥之爲文奮之爲武易曰殊塗而同歸百慮而一致

廉樞廣運章第三

天非廉則氣戾地非廉則形隳人非廉則衷罔廉也者理之樞也不可睽也可睽非廉也是故誠非廉則厲仁非廉則懦義非廉則苛禮非廉則飾樂非廉則乖智非廉則鑿勇非廉則亂忠非廉則欺孝非廉則阿弟非廉則昵慈非廉則賊信非廉則絞別非廉則執恭非廉則蕙言非廉則誣明非廉則察聰非廉則塞和非廉則流中非廉則倚息非廉則惑睿非廉則窒道非廉則畔德非廉則悖政非廉則駁刑非廉則濫賞非廉則僭文非廉則慝武非廉則黷子息曰溥

博淵泉而時出之此之謂也

廉君宰世章第四

廉君者天地人物之宰也猶天之清猶地之寧猶人物之生本一氣之凝承無天無地無物無我無人廉極懋建而廉化攸興是故貴而卑以賤富而約以貧安而惕以危治而憂以亂合天地人物我身平天地人物我心天由以清地由以寧人物由以生是謂允用厥廉之成孔子曰舜禹之有天下也而不與焉廉君之謂也

君心廉感章第五

君心天心也天心人心也愛人以敬天也敬天以親人也賢人人英而天靈也用賢以安人而承天也是故待賢惟誠擇賢惟明則天心眷而人心順天降之人薦之原厥君心之廉誠精而神明與天心一也與人心一也與賢人心一也湯曰帝臣不蔽簡在帝心

廉臣持世章第六

廉臣者殫心格君以體民也身任社稷焉已矣進賢為急分陰是惜洞察幾微深息抵極光訓對揚振肅紀綱知乾坤有毀觀時運靡當聞大道攸行罔耽耀榮專造平康前補有漏後貽無量是故一臣倡之庶

臣效之生則世賴之沒則世祀之伊尹曰為上為德為下為民此廉臣之職也

廉士守身章第七

凡民俊英賢而未爵曰士士也者尚志而守身也是故身賤而志不賤身貧而志不貧身屈而志不屈身辱而志不辱身困而志不困志也者心神而身帥也竟塞天地天地正氣由我而住始在息夜氣利罔干心心靜而專克篤維廉若處女然衛風曰考槃在澗碩人之寬獨寤寐言永矢弗諼夫寬也匹天地有容也永也匹天地無疆也此廉士之操也

廉民保家章第八

王法即天理天理在民心民心肆則天理亾而王法違家不可保是以欲克保厥家先克謹王法居焉容膝已矣毋安也饌焉適口已矣毋旨也服焉蔽體已矣毋華也妻焉毓嗣已矣毋豔也業焉恒生已矣毋腴也器焉利用已矣毋巧也交際焉成享已矣毋豐也是故陋以矯安非以矯旨質以矯華淡以矯豔瘠以矯腴拙以矯巧儉以矯豐是以心廣身輕憂寐攸寧氣宇光霽類聚和平易豕曰節以制度不傷財不害民此廉民之分也

育廉端蒙章第九

古內則也有胎教慎厥身常聆絃詠以孚嬰孩天真
是故廉之根也誕弄之璋幼示毋誑式歌且舞以燮
天和長入大學強乃仕是故廉之成也其出也為廉
臣其處也為廉士孔子曰性相近也習相遠也又曰
有教無類

廉貪幾先章第十

稽昔代興若天地開闢而清寧將亾若天地渾沌而
晦冥皆由人心生夫貪故不均不均故不平不平故
憤憤則爭肇啓 聖明用重典以戡懲消憤爭致均

平廉風斯行是謂剝復之貞噫廉貪分則興亾決矣
易繫曰幾者動之微吉凶之先見者也

貪戾敗廉章第十一

利匪止金金惟利罔貪匪止利利惟貪的匪金弗利
匪利弗貪夫金在土草不生人聚金多生氣削子孫
微身命促矧金用物也流行世間罔令久藏鬼神攸
司誠可畏也是故貪根種心惟利惟金蠱惑息慮消
鑠精明如醉如夢雖生弗生癡愚世延驕奢禍程蓋
棺空手逝矣何益之有倡茲貪戾乎莫若崇廉去貪
貪則繁廉則簡簡斯逸繁斯勞周官曰作德心逸日

休作偽心勞日拙

考廉成信章第十二

夫心廉則言廉也清而不洩勁而不撓音中商氣凜
冽匪言難知言難也今士以言進也是故鬻序以廉
儲督學以廉校科第以廉掄壹倣漢世嚴賓孝廉廉
無遁也或曰迂乎曰吉言寡躁言多疑言支叛言慚
曰我知言我善養氣惟善養氣斯能知言也表記曰
事君先資其言拜自獻其身以成其信此之謂也

試廉精別章第十三

周官小宰六計弊群吏之治而貫以一廉廉也者吏

之本也故曰廉善廉政廉能廉敬廉辨廉法甚矣成
周重廉也今舉劾宜曰某也廉廉某某也不廉不廉
某吏銓按廉而陟之陟之者廉陟也按不廉而黜之
黜之者不廉黜也則群吏皆好廉惡不廉又王官人
曰其壯觀其廉潔廉潔而不戾此之謂也

擇廉密漸章第十四

邑得廉令焉欲民不安不可得也郡得廉守焉欲令
不廉不可得也省得廉監司焉欲守不廉不可得也
道得廉御史焉欲監司守令不廉不可得也夫親之
以令鎮之以守監之以監司糾之以御史一惟廉焉

學山 廉知一 廉知一
民永安也是故擇御史監司守今在吏銓擇吏銓在
相擇相在君心雅曰式訛爾心以畜萬邦

嫉廉形貪章第十五

貪者嫉廉者形貪也詆訾廉者聞廉言曰迂談見廉
行曰矯弊聞廉譽曰盜名見廉猶曰好異倡曰舉世
惟錢已矣居家惟富已矣求進惟賂已矣謀生惟利
已矣何必廉嗚呼後廉而先貪空廉者悴貪者肆也
曹風曰蒼兮蔚兮南山朝濟婉兮變兮季女斯飢
偏廉害治章第十六
廉者常也不廉者變也今廉者見不廉者衆也負恃

厥廉元而驕凌而鑠僭而越威而虐深文以織之重
典以入之酷捶以鍛之及不廉者不若也夫不廉者
憚且戢多平釋之是故廉者刻不廉者恕恕者隆刻
者替今見廉不廉異報相率怠于廉蓋天心好生小
廉而大惡偏之害也若廉而恕不察不廉而禁制若
不廉是與鄙風曰子之不淑云如之何

拔廉崇化章第十七

久矣習性棄廉也匪大獎廉行則廉烏能興夫人心
活而神奇轉移惟機懋建廉極以作氣而惺迷是故
越格以擢之物色以求之旌褒以揚之廉者在位野

無遺廉廉乃勸四海永清記曰風霆流行廉化速乎
乘時尚廉章第十八

上古同廉而無尚也尚忠中之也尚質實之也尚文
紋之也文偽而滴故孔子尚仁純之也仁煦而懦故
孟子尚義毅之也是以惡鄙夫懲夷狄絕鄉原闢揚
墨斥五霸復廉性也夫五霸匡功揚墨緝學鄉原修
名惟鄙夫夷狄一也性貪殘也榮夷嗜利而犬戎侵
訐類應也予志孔孟而尚廉壹明仁義之教噫責予
者惟廉乎知予者惟廉乎魏風曰心之憂矣其誰知
之其誰知之蓋亦弗思
一卷完

醫先卷一

上醫治未病不治已病治未病易而無迹治已病
勞而罔功是故未病者多忽而已病者始求諸醫
醫雖良其如病成何膏肓之諭惜也自秦以前墳
典完備學出于一養德養生無二術云秦以後坑
焚燼漸幸素問猶傳學者棄而不講目為偽撰蓋
不知多參贊至言非聖弗能也矧天子以至庶人
脩身為本豈有遺身而能用世邪是在辨之早焉
已矣于是作醫先蓋先未病而醫之不施餌劑砭
針同躋仁壽之域覽者庶以監予之心豈曰不為

良相當作良醫云爾嘉靖庚戌夏五既望海鹽沂陽生王文祿

沂陽生曰養德養生二而無全學也矧天地大德曰生今以養德屬儒曰正道養生屬仙曰異端誤矣身亾而德安在哉故孔子慎疾曰父母惟疾之憂教人存仁致中和孟子曰養氣持志集義勿忘勿助是故立教以醫世酌人情而制方周末文靡則偽故存仁戰國氣暴則蓋故集義存仁完心也志定而氣從集義順心也氣生而志固致中和也勿忘助也疾安由作故曰養德養生一也無二術也

岐伯曰陽為氣陰為味味歸形形歸氣氣歸精精歸化化生精精生氣氣生神黃帝曰予知百病皆生于氣也怒則氣上喜則氣緩悲則氣消恐則氣下寒則氣收熱則氣泄驚則氣亂勞則氣耗思則氣結九氣不動何病之生沂陽生曰養生賢養氣養氣賢養心養心賢寡慾寡欲以保元氣則形強而神不罷若形壞則神不存神離則形不固形譬燈缸盛油神譬燈油然火搖翻燈缸則燈油瀉炙乾燈油則燈缸裂必形與神俱即鬼鬼足榮衛調夫榮血也衛氣也氣以衛血血以榮氣岐伯曰根于中者命曰神機神去則

機息根于外者命曰氣立氣止則化絕沂陽生曰神氣之旨妙哉在心悟之而已

男子以氣為主故賢右手脉盛女子以血為主故賢左手脉盛然人之身氣為衛血為榮無分男女皆以胃氣為主故曰得穀者昌絕穀者亡沂陽生曰胃氣者中氣也慎言語則中氣不散而上越節飲食則中氣不滯而下洩故易頤象曰君子慎言語節飲食頤者養也養生養德其可舍諸東垣李杲專主脾胃制補中益氣湯且作箴自警知本哉

沂陽生曰甚矣精為至精之寶也故岐伯云精者身

之本也是以精枯則病精竭則死夫勞極則精罷思極則精離飲食少則精減房欲頻則精耗試觀樹木撥皮膏脂則萎枯矣夫人曷可妄用其精哉故曰精不妄用則氣不散氣不散則神不移又曰息不可用意不可動意動則神移神移則氣散氣散則精亡道德經曰致虛極守靜篤谷神不死是謂玄牝黃帝曰地為之下否乎岐伯曰地為人之下太虛之中者也曰馮乎曰大氣舉之也沂陽生曰勝邵子天地自相依附之說夫地即血天即氣天包地氣載血今人骨肉臟腑皆血也魄也神靈運用皆氣也魂也

人死乃魂去魄存氣散血尚聚也是以譽養氣世降
氣轉耗也朱丹溪乃曰氣有餘血不足藥專補血夫
氣有餘邪氣也正氣何嘗有餘岐伯曰人以胃氣為
主甚矣譽養氣也

補血用四物補氣用四君子夫四君子溫藥補氣正
以生血四物涼藥未能補血先傷胃氣張仲景用人
參生新血陽生陰長也夫參色黃白性沖和若補氣
味甘溫內紅潤若生血仲景得神農嘗藥之心者乎
沂陽生曰醫家論氣血二字卽儒家論知行二字氣
血知行皆統于心一也用藥講學不得不詳分言之

豈可二之若冰炭也

沂陽生曰參者參也名人參參三才也諸藥以人參
為主猶人以穀氣為主故御佳穀者必先飯則油膩
不溜下而為洞洩諸藥非參曷運行但視病虛實為
多寡耳

醫者意也度時致病者意起之立方醫之若天時聖
教不同也羅太無見元世夷風奢靡豐于滋味濕熱
痰火致病常多故授朱丹溪以清金降火之法乃辟
和濟局方溫補之非矯之過也夫局方熱藥固不可
丹溪專用涼藥亦不可况今元氣日耗也用丹溪法

治者多壞脾胃蓋痰生脾濕熱生脾虛必用東垣補脾法爲上是以醫者審氣運察人情及致病之原丹溪曰溫補者非溫藥補之也溫猶溫存之溫沂陽生曰非溫藥不補予嘗服參芪苓朮等藥則精神倍常服四物湯則否或作瀉蓋芍藥性寒能伐生發之氣當歸滑洩而潤大腸川芎走陽分而氣散地黃亦性寒且滯涩而生痰服之若飲涼水多傷脾胃夫脾喜燥惡濕喜煖惡寒試飲熱酒啜熱粥面津津然色澤冲和四支舒暢使冷物則否故曰形寒飲冷則傷肺此之謂也

沂陽生曰養神之術去牽引而已矣牽如牽纜之牽引如引弓之引舟欲疾必牽行之急矢欲中必引滿之審纜斷則舟住矣矢釋則弓舒矣欲寡則神凝矣大雅曰無然叛援無然欣羨誕先登于岸

沂陽生曰一切病皆生于心心神安泰病從何生不觀農夫冒暑耘耨無暑病相習忘之也凡心動卽火起外邪斯入矣是以賢忘外

內經曰喜怒傷氣寒暑傷形沂陽生曰慎喜戒怒氣調矣禦寒避暑形固矣心主之也苟能雖喜忘喜不累于喜雖怒忘怒不累于怒雖寒忘寒不累于寒雖

暑忘暑不累于暑形氣豫全何傷之有非至人曷足語此

或問髮白何也沂陽生曰省思慮則心血不耗髮不
易白矣蓋髮屬血也問鬚白何也曰遠色慾則腎精
不耗鬚不易白矣蓋鬚屬精也又問年高則形容老
何也曰心為形役有耗無益是以易老若能一切忘
之則身且忘矣况年乎故曰天若有情天亦老天之
蒼蒼者不變則人之形容鬚髮亦可以無變也司馬
子微坐忘論欲法太虛云爾
沂陽生曰心火不炎則無瘡瘍諸疾戒暴怒則無中

氣諸疾夏至陰生絕慾至秋分則無中暑瘧痢諸疾
冬至陽生絕慾至春分則無傷寒瘟疫諸疾此謂順
天時法陰陽以自固求子則子壽養生則生怡

褚澄曰脾以養氣肺以通氣腎以泄氣心以役氣肝
則氣常生心虛氣入為蕩肺虛氣入為喘肝虛氣入
目昏腎虛氣入腰疼脾獨不與受食不化氣將日微
安能有餘以入虛沂陽生曰脾之繫于生人大矣思
則傷脾多食則胃塞而脾不能運亦受傷是以養脾
者養氣也養氣者養生之要也

褚澄曰咳血飲溲溺則百不一死服寒涼藥則百不

一生沂陽生曰血雖陰類運之者其和陽乎褚氏聖醫也故表出之以為醫者法

沂陽生曰卓哉褚氏之見道也悟五運六氣之非且曰大撓甲子皆志歲月日時遠近耳配以五行位以五方皆人為也齊有此人過宋儒矣

養耳力常飽養目力常瞑養臂指常屈伸養股趾常步履夏臟空涼冬臟空溫背陰腹末雖夏空溫胸包心火雖冬難熱沂陽生曰節宣參贊以位育吾身在審之而已矣

沂陽生曰心血方寸甚幾希者日晝欲火煎熬指亡殆盡則神不能留非時時靜養之烏能延生當念夜氣滋息而慎之以保命為要可也

沂陽生曰六氣不侵七情無擾清虛恬靜之日日如之則病安從生不變不動而能忘之則忘日忘年壽與天地等而不老矣形安能槁奈何至易而人不肯為日自戕其生理也蓋慾火炙烈每日暗損一分不覺積久損多矣以原稟厚薄為壽之修短也

參元朱子曰精字氣字從米是精氣皆資于米沂陽生曰人以穀氣為主是以得穀者昌絕穀者亡

參元朱子曰病字從丙丙火也百病皆生于火沂陽

生曰病字內丙固火外二點從水內火盛而外水微且相間隔則病水火既濟則無病仙家火候火降則水升水火一也偏之則二二則爭

沂陽生曰冶工鎔金鑄器必鑪範俱熱炭火焰紅一鑄而成無空缺不完之隙使一有不熱透縱成不完也今鑄人者可不鼓動天機陰陽活潑而妄施乎無病女子經絕一日男子夜半子時陽生交感投虛之法血裹精成男褚澄曰陰血先至陽精隨冲以血裹精成男沂陽生曰成胎者氣射之也而神從之蓋精生氣氣生神精足則氣足氣足則神足

猫犬麋鹿必春時孳尾積之一年施之一旦未見有不育者况周禮仲春令會男女亦乘發生之氣耳沂陽生曰人求嗣者男女無病十月陰盡陽生時遠房室絕嗜慾以待來年春仲交會得之必男必壽蓋曠久情濃積久精厚陽盛必男也得胎後不可再交不動慾火必無痘瘡之毒靜養則它日德性聰慧沂陽生曰觀獸交有時當積精全神以豫養觀鑄金之足火力當臨期起興之須濃

甚矣胗脉之難也王叔和脉經左手寸心小腸關肝膽尺腎膀胱右手寸肺大腸關脾胃尺命門三焦五

臟六腑脈之定位也重按為臟臟者藏也輕取為腑
腑者附也一指間重按分浮中沉輕取分浮中沉一
部又分浮中沉數息且分至數何微乎楮澄尊生經
男脈一如叔和女則左手寸命門三焦關脾胃尺肺
大腸右手寸腎膀胱關肝膽尺心小腸男尺常弱初
生微眇之氣也女尺常強太陽心火之位也沂陽生
編考方書悟褚論為精男女陰陽分也姪則男抱母
女背母溺則男面覆女面仰男命繫腎衰自下始故
小腹先垂女命繫乳衰自上始故乳房先槁雲間儲
沅桂疑篇同噫庸醫渾醫死者可勝言哉曰一卷完

機警一卷

沂陽子曰予生也朴室見事每遲閱書史中應變
神速轉敗為功者錄以開予心云各條末贅數言
以自警類長之能事畢矣嘉靖丙午海鹽王文祿
武王封師尚父於齊就國道宿行遲逆旅之人曰吾
聞時難得而易失客寢甚安殆非就國者也尚父聞
之夜衣而行犁明至國萊侯來伐爭營丘沂陽子曰
尚父敦商造周威名著矣就封常典徐行若無虞旅
人且憂焉勤勵之心無時可已也使諷而不聞聞而
不悟營丘失矣噫旅人者靜觀則明尚父豈功成或

怠邪時難得而易失尤為至警

王稽使魏載范雎入秦至湖關望見車騎從西來雎曰彼來者為誰稽曰秦相穰侯雎曰聞穰侯專秦權惡納諸侯客恐辱我我且匿車中穰侯勞稽謂曰謁君得無與諸侯客子俱來乎無益徒亂人國耳稽曰不敢即別去雎曰聞穰侯智士也見事遲向疑車中有人忘索此必悔之於是雎下車走十餘里果使騎還索車中無客乃已沂陽子曰應侯脫死亡命慮患深操心危矣望車騎而疑之知穰侯而料之先匿車中以潛踪繼走車下以避索閒逸不亂非養不能也

末也讓位蔡澤以穰侯為戒哉

楚悼王死宗室大臣作亂攻吳起吳起走之王尸而伏之射刺吳起并中悼王楚令傷王尸族太子立使令尹盡誅射吳起并中王尸者坐夷宗死七十餘家沂陽子曰起長于兵謀臨死猶能令後王復仇云走伏王尸冀避害且害彼攻者諸臣不悟墮起計中矣噫死猶用智孰若生能見幾

燕師長驅平齊田單走安平令宗人盡斷車軸末而傳鐵籠已而燕軍攻安平城壞齊人走爭塗以軸折車敗為燕所虜唯田單宗人以鐵籠故得脫東保即

墨沂陽子曰田單復齊由保卽墨保卽墨由傳鐵籠
倉惶臨難而心不亂先幾之見非豫養弗能也噫卒
勝樂毅單名將之傑歟

楚公子遇國難微服出亡將及門守門者難之其僕
操筆擊公子背罵曰隸也不力何不早出守門者不
疑竟出云沂陽子曰將欲出之必固辱之使尊禮之
彼阻之矣是以及之而訛其識也

楚伏弩射中漢王漢王傷胸乃捫足曰虜傷吾指漢
王病創臥張良強請起行勞軍沂陽子曰傷胸則能
殞命衆聞之驚疑而生怠楚兵乘之敗衄必矣傷指

則無害也起而勞軍亦以定衆志漢之興決于此
呂布屯濮陽曹操圍之城中大姓田氏爲反間操得
入城燒東門示無反意及戰軍敗布騎得操不知是
否問曰曹操何在紹曰乘黃馬走者是也乃釋操而
追乘黃馬者操突火而出沂陽子曰操出入行陣勝
敗神色不動匪稟之厚則養之深操嘗曰秋冬校射
春夏讀書呂滙子曰周文子發旦三聖魏武子不植
三文盛矣哉心術則殊後世繼之者鮮也

王羲之幼時江州牧王敦甚愛之恒置之帳中眠敦
嘗先出羲之猶未起錢鳳入敦屏人言逆節謀忘義

之在帳義之覺備聞知無活理乃佯吐汗頭面被褥
詐熟睡敦言畢方悟相與大驚曰不得不除之及開
帳見吐信之乃得全沂陽子曰義之早慧故能脫虎
口至親何益哉是以君子賢豫遠惡人也
李勣孫敬業年十齡餘勇悍異甚勣心患之伺其入
林獵獸縱火焚林敬業見火到剗所乘馬入其腹中
火過浴血而出沂陽子曰成敗論勣勝敬業大體論
敬業勝勣匡復雖虛武嬰褫魄反周為唐陰有力焉
蓋見人心在唐不易章也兵敗後敬業與駱賓王俱
遁去有是哉

張乖崖誅守蜀兵火之餘人懷反側一日大閱方出
軍衆忽嵩呼者三乖崖亦下馬隨衆東北望三呼攬
轡復行衆不敢謹沂陽子曰是舉也尊君而定亂且
伏衆心聞于朝雖權重而不疑四方皆知忠義之風
心神完定乃能從容若此後與傅霖仙去然乎

太宗大漸李太后與宣政使王繼恩忌太子英明陰
與其黨謀立潞王太宗崩太后使繼恩召李端端知
有變鎖繼恩于閣內使人守之而入太后謂曰宮車
晏駕立嗣以長順也今將何如端曰先帝立太子正
為今日豈可違先帝命更有異議乃迎太子立之卽

學山
位垂簾引見群臣端于殿下平立不拜請捲簾陞殿
審視然後降階率群臣拜呼萬歲沂陽子曰神定哉
非有聖學不能也禁邪敏速審事從容宋臣不下伊
呂矣

真宗不豫李文定迪宿內祈禳時太子尚幼八大王
元儼頗有威名問疾留禁中累日不出執政患之偶
翰林司以金盃貯熟水過問之曰王所需也文定取
案上墨筆攪水令盡黑王見大駭意其為毒卽上馬
去沂陽子曰知彼知己百為百中蓋文定素知元儼
膽怯者可駭而走也不然幾不為所破邪

文潞公彥博知成都大雪會帳下卒有評語共拆并
亭燒以禦寒軍將以聞公徐曰今夜誠寒亭弊矣正
欲改造更有一亭可盡拆為薪樂飲如常明日乃究
問先拆亭者杖而流之沂陽子曰令不素字亦疎矣
寒不恤下亦忍矣特取定一時之變耳是故御大衆
者寒暑當豫處云

司馬溫公光幼與群兒戲一兒墮大水甕中已沒群
兒驚走不能救公取石破甕兒出得活沂陽子曰惟
誠故神蓋已見于幼時宜其當國而任台鼎重寄也
諺曰三歲至老信夫天地間氣攸鍾豈凡例邪

苗傳劉正彥叛張魏公浚在秀州謀舉勤王師聞苗
劉偽詔將至公潛取府庫中舊詔令持往十里外易
之詔既至令僚屬宣讀畧張於譙樓旋卽歛之大犒
諸軍群情賴以不搖一夕獨坐從者皆寢忽一人持
刀立燭後公知刺客徐問曰汝非苗劉遣來殺我乎
曰然曰若是取首去曰予頗知書寧肯為賊用况公
忠義豈忍加害恐防閑不嚴有繼至者故來相告爾
問欲金帛乎笑曰殺公何患無財然留事我乎曰有
老母在河北未可留也問姓名俛而不答攝衣躍起
屋瓦無聲時方月明去如飛明日公取死囚斬之曰

夜來獲一姦細後嘗河北物色之不可得沂陽子曰
詔至易之以安衆心密矣且疎自檢慎哉臨事無時
無處無不密也明發取囚斬之揚言之絕後至者則
密矣其亦聞言而悟與

趙從善尹臨安宦寺欲窘之一日內索朱紅卓子三
百隻限一日辦從善命於市中取茶卓一様三百隻
糊清江紙朱塗之卽成兩宮幸聚景園回索火炬三
千枝限以時刻從善命於娼家取竹簾束之頃刻而
辦沂陽子曰相傳開濟館某尚書家 上郊祀索白
染圍鑪三百尚書窘迫莫應濟教截矮卓脚鑿圓孔

白紙糊之取鐵鍋為鑪如數進
 上喜詰之舉濟是
 時索燎火萬炬于上元縣令陳煥煥命各坊長督大
 小戶具門簾香燈迎
 駕遂命捲簾為燎得如數進
 上稱其才二事正符豈暗合耶亦見此推之也以故
 貴讀書多

辛幼安在長沙欲於後圃建樓賞中秋時已八月初
 旬吏曰它皆可辦唯瓦難辦幼安命於市上每家以
 錢一百貨簷前瓦二十片限兩日以瓦收錢於是瓦
 不可勝用沂陽子曰建樓賞月細事也尤能速成示
 敏也且以起衆心云蓋幼安志存恢復若以無瓦止

它日用矣何以鼓之殆徒木立信之意

紹興十二年京東王知軍寓新淦之清泥寺嘗燕客
 中夕散夫婦醉臥俄有群盜入執諸子及群婢縛之
 婢呼曰主家司庫鑰者藍姐也藍姐即應曰有毋驚
 主人盡付匙鑰秉席間大燭指引之金銀酒器首飾
 盡數取去主人醒方知明發訴于縣藍姐密謂主人
 曰易捕也群盜皆衣白妾秉燭時盡以燭淚汚其背
 當密令捕者以是驗後果皆獲云沂陽子曰藍姐一
 婦人耳臨變忙迫中而從容用智天資何穎敏也張
 敞傳載赭汗盜衣裾執之與此暗合但彼緩圖此急

應且婦人猶難云

嘉熙間江西峒丁及萬安令黃炳鳩兵守備忽五更報寇至炳遣巡尉領兵迎敵衆皆曰枵腹奈何炳曰第速行飯且至矣炳乃率吏輩攜竹籬木桶沿市民門呼曰知縣買飯時人家晨炊方熟厚酬其直負之以行於是兵皆飽食一戰破寇沂陽子曰師行餉從無餉曷濟貴神速遲或生變炳兩得之胸中經畫素定矣噫安得斯人與之談兵哉

機警一卷完

盡度一卷

海鹽沂陽王文祿世廉

慎終第一

親之終也人子痛極魂迷卒然臨變欲復不能後抱終天之悔無及也矧終者人之大限也慎終者人子之大事也是以合棺至成墳不可不詳也予懼二艱瘁心力爲之猶多後悔今尚未平死復不加意欲無悔得乎甚矣慎終空豫也

合棺第二

油杉爲上柏次之油杉今沙坊版出馬湖建昌桃花洞楊宣慰旋螺丁子香花紫實上也但假者多耳莫

若川柏紫經杉可也棺斲容身不空大蘇匠製若經匣樣底蓋不用鐵丁用柏或蘇木作錠筭底蓋對墻合處每邊鑿二孔筭作錠樣分三片先鑿左右二片入孔分開中一片針下錠凹處到割住矣且免鐵綉壞版釘擊震戶錠筭法聞之西泉錢子懋仁名蔘仁孝士也以故能慎終

歛法第三

古有大小歛之法今皆廢之吳南溪云歛能固尸不特禦行路動搖而已昔聞魏莊渠遷葬啓棺見親骸宛然歛之力也予先慈淑母氏歿九月不歛先康毅君夏六月小歛尚憾不忍裹首未盡也為人子者曷可不知大小歛之法哉

入棺第四

鋪棺底今用竈間柴灰柴灰帶火性且鹹濕甚不可也或用石灰和陳壁土或用炭細末和石灰或用燈心草或用山黃紙家禮用糯穀殼燒灰今云斑糠但一時不易得也予息之石灰炭細末及寺觀中燒過紙灰三和之厚鋪棺底再覆白紙紅絹梓木版寸餘厚與棺底一樣壓之方入褥席與尸四傍布帛與紙塞實不使有空隙可也木枕裹布展首不仰垂二親

因俗用紙枕今尚憾也惟外母先祖得用木枕云

擇地第五

古云五害不侵高山忌石巉巖平原忌水衝射土脉膏潤草木暢榮來龍迢遙結穴端正水環沙護卽吉地也近泥天星卦例方向不顧龍穴沙水多斜側反背爲之主家徼福不悟也且親存享爽塏華居歿葬形勝吉地親體安子心安矣若專徼福則唐宋豈乏吉地邪何變更也當不違天甚毋徇地塏

開壙第六

葬者藏也深葬爲安不宐及泉耳今捲蓬發券塏古

殯法非葬法也予塏二親于待葑原掘土深三尺三寸下有黃脉成山尖形自亥轉巳橫當塏心若非深塏曷見也金井長一丈二尺闊一丈五尺四寸糯米粥調純石灰築底一尺厚四圍墻一尺二寸厚中墻隔二槲亦一尺厚火磚一尺長四寸半闊三寸厚重六斤一面印學圃王公慈淑陸氏塏磚一面印嘉靖己亥孝子王文祿監製惟印字也窰戶鍊泥細熟且堅而不裂糯米調純石灰一橫二縱層疊砌成墻厚一尺爲二槲底鋪條磚一層並方磚一層地面磚一層塏內復加六斤磚一層連灰縫一尺厚堅築以備

歲久樹根蛇獲損壞苦心極矣百世之下誰予憐邪

擇灰第七

灰乃青石燒成內有不着火未過石筋亦有侵白土及白石末須用水碗中試之乃見惟灰真正則發而堅不可不慎

燒磚第八

石墪生水必用火磚則乾燥色青聲響乃燒透者若黃色無聲不堅也必與高價則泥細而熟燒且透而磚必堅人子為親止此而已豈可吝乎

和灰第九

灰隔法三分石灰一分黃土一分湖沙曰三和土予偶閱一書曰石灰火化糯粥水煮合築之水火既濟久久復還原性結成完石今日黃土山間爛黃石末也若黃土損其石力不能成石云予築二親墪用糯米粥純石灰唐一庵曰湖州山中有寫樟樹取皮葉杵爛水浸取汁甚粘勝糯粥也陳坊師鳳曰古法得土而粘得砂而實予只用沙不燥裂耳非特禦斧鑿也凡墪以三和土為得中制

築法第十

和灰須乾濕均停搏之成塊撒之成灰若太濕則粘

杵難築太乾則燥散不堅凡鋪二寸餘厚築之一分
漸漸築起人力須齊不可停歇歇則結皮不相連矣
不能一日完必鋤動面皮刷汁加築硜硜有聲錐釘
不入為妙

取汁第十一

糯米舂白煮粥方稠粘鍋中投石灰冬不冰人且不
食若寫樟樹價尤輕擣皮葉水浸之汁自出其汁一
絲墜地盡瀉出也汁灑于地其樹即生今人憚于路
遙而不用予至今悔之凡作灰隔不可不求此樹云

入塚第十二

先用乾石灰鋪塚底後用二布懸棺而下頭北足南
首丘而向明也男左女右從昭穆也棺外四圍空隙
俱用糯粥調純石灰輕輕築實之毋使震動棺中棺
蓋上亦然與磚塚平乃覆石蓋朱紫陽所謂實壘永
無客水之侵後雖地震亦不動也壽塚須用細土填
實它時臨用取去之蓋石泯縫免使客水得入

石蓋第十三

紫色石堅二塊合縫易于蓋予二親蓋石上築純灰
一尺二寸又加三和土尺餘四圍純灰隔外套下二
尺餘又壓大黃石數十塊三和土挨之碎黃石數十

學山 卷之五 靈辨
担覆砌之大石取其重後人難動細碎石取其無用
且壞犁鋤嗚呼愈覺予心之苦也

成墳第十四

墳者土之墳起者也惟山為宜且五害不侵然吳下
多平原焉得人皆山墓須積客土成山高則氣暖
且不易侵掘若種松柏成林不免樵薪之用江右封
而不樹恐奪生氣也予則曰樹盛蔽陰土濕而天光
不照今宜少種樹而多培土古云難保百年墳悲夫
人各有親君子當憐而存之且律例嚴發掘之禁此
聖王仁及枯骨而安孝子永世之心

任匠第十五

嗜利者衆匠鮮得人得人矣尤宜卑禮厚償無不盡
心也予海寧衛陳巧師鳳矢心忠信好善憐予築二
親塋日夜盡心予亦敬之不忽每見為人築塋亦不
苟然須人子盡誠以感之故曰取人以身

雜辨第十六

金玉殉葬古何愚也今則否發齋帛列石器盛行喪
今何侈也塋則苟畧且作便房藏明器簪髻穀脯又
何愚也今猶然夫妻雙塋穿墻孔曰孝順洞通魂往
來何愚也皆損塋夫塋靳容棺空隙須糯粥調石灰

學山 卷之二 墓度 二 築實為妙曷尚虛文哉

魂帛辭祖有同兒戲且不忍見也玄纁之贈又何說也不亦戲甚乎予墓二親悉皆不用

墓時以二杠橫塋口移棺安杠上用二布作活套索懸棺齊力起杠放下甚穩也卷蓬塋頂隧道進棺此古殯法墓門客水易入塋頂久必坍塌毀矣戒之

徽術士言塋底不砌磚不築灰隔恐絕生氣也吁可恠哉生氣無堅不透豈礙塋底棺着土易朽必生媪食亾人腦且土侵膚人子之心安乎塋底須築灰隔一尺厚磚砌一尺厚可也

地理陰陽正源托厲布衣撰謬甚也有流注布氣法塋底四方空砌磚溝中砌金斗吉方又砌曲溝引入斗中皆實以炭上蓋方磚開竅流注生氣布向尸棺以致塋內空虛引入外水害甚也鄙夫且用于陽宅可為一笑

炭屑築塋外雖止樹根聚水也瀝青溶塋內地暖不結生水也炭溝泄內水反引外水也皆不可用也

墓誌埋于灰隔外三四尺予墓二親四圍與蓋上皆有志略云嗚呼心愈苦矣

杭城墓法先掘深坑四邊敲熟焚松柴于中燒一二

學山 卷之二 墓度 二 露荒

日堅實如磚待冷底鋪石灰下棺加灰築實今當外用此法內築三和土尤妙也

昭穆附葬形勢寬大祖中矣或前或後止可半尺許不然脫脈也二妻者夫居中

得水為上視地形為遠近點穴遠前水二十丈或十八丈十六丈太近恐世久坍入水中

飯含金玉古之陋也奠背錢護心鏡今之陋也

苑忌日犯重喪搏泥作寸許人形同桑根殉棺中陋甚也凡入棺用草麻杖何取乎悉屏之可也人子臨喪哀毀切矣術士亂為之法當禁制

一卷完

補衍卷一

齊騶子衍游燕燕王師之築碣石宮深觀陰陽消息作恠迂之變終始大聖主運之篇十餘萬言竟無一言存惜也遷史載篇目且不詳豈秦火亡邪予仰息學何受也殆夙稟六通神聖徒歎每覽典傳有合者按篇目彷彿類集之曰補衍凡四篇用廣寰中瑣見之陋云海鹽沂陽王文祿世廉

天地終始篇

氣彌虛空性真湛澄無初無疆渾闢靡停同異攸列往復有恒大化自然莫虧莫增補天地終始

天地始終謂一大劫劫壞時火災將起天久不雨所
 種不生依水泉源四大駛河悉竭久後有大黑風暴
 起吹使海水兩披取日宮置須彌山半安日道中七
 日輪次第現出一日出百草樹木一時凋落二日出
 四大海水漸涸三日出四大海水轉消四日出四大
 海水淺阿耨達池竭五日出四大海水竭盡六日出
 大地烟生火起從須彌山至三千大千刹土靡不悉
 燒七日出大地須彌山崩壞洞然諸寶爆裂焰震動
 至梵天盡成灰墨此名器世間須彌漢言崑崙
 已壞滿二十中劫壞已復二十中劫住過七火災已

從此生水界起壞器世間如水消鹽此水界與器世
 間一時俱沒沒已復二十中劫住過七水災已復七
 火災從此生風界起壞器世間如風乾支節復消盡
 此風界與器世間已壞

壞劫後各空劫經無量久劫欲成時火自滅起大重
 雲注大洪雨滴如車軸復經無量時雨止水聚從下
 水輪湧沸水上騰漂浸決遍滿梵天四風輪所住持
 水漸退下余時四大風起欬然飄擊吹彼水聚混亂
 不停水中自生大沫聚大風吹沫擲置空中從上造
 梵天宮七寶間成水更退下湛然停住四方浮沫水

學山 卷一
上深厚周闊大風吹沫復造須彌山又吹沫四面散
擲造四大洲八萬小洲并餘大山周匝安置亦時大
闇有大黑風吹大水聚底漂出日月置須彌山半安
日道中繞須彌山洞照四方炎退水濕又大風吹掘
大地漸深入置大水聚為四大海是故風界吹起火
界蒸煉地界堅實

天地更始光音天人化生梵宮名娑婆娑帝以念為
食光明自照神足飛行地湧甘泉食之漸生麤肥失
天妙色神足光明日出則懼日入則懼乃現星月分
晝夜晦朔春秋歲數終而復始無男女尊卑眾共生

世故名眾生甘泉竭生地味眾生因食地味遂生勝
負是非心地味稍歇生地皮地皮滅生地膚地膚滅
生地肥地肥不生更生蒲桃眾生食多共相形笑蒲
桃不生更生杭米米長四寸無糠糲莖葉自根至末
纍纍繁夥隨刈隨生眾生食久生男女根形欲多成
女故有夫妻姪欲轉增遂夫妻共住光音天人降母
腹中因有胎生亦時眾生併取日糧相毀併取五日
杭米漸生糠糲刈已不生遂有枯株眾生各封田宅
杭米以為墻畔自藏已米盜他田穀無能決者議選
眾中形貌尊雅甚有才德請立為平等主名刹帝利

主行賞罰保護衆生尔時造瞻婆大城一切城郭遂
有刀杖等物考楚殺戮由有田穀致此爭訟故各共
戒割以供給之於是始有民主貢稅城郭田宅屋舍
生老病死之事

四大洲南閻浮提洲縱廣七千由旬北廣南狹如車
廂人面如之壽百歲寶主臨海盈寶東拂于逮洲縱
廣九千由旬圓如滿月人面如之壽三百歲人主和
暢多人西瞿耶尼洲縱廣八千由旬彎如半月人面
如之壽二百歲象主暑濕空象北鬱單越洲縱廣十
千由旬四方正等人面如之壽千歲馬主寒勁空馬

四大洲地心乃須彌山山外有八山圍如須彌山須
彌山四寶所成東面黃金南面琉璃西面白銀北面
玻璃在大海中香山南大雪山北上有阿耨達池東
從牛口流出疏伽河入東南海南從象口流出信度
河入西南海西從馬口流出縛芻河入西北海北從
師子口流出徙多河入東北海潛流地下出積石為
中國河源

大鐵圍山卽須彌山四周圍輪并一日月晝夜轉照
四方名爲一國土卽以此爲量數至滿千鐵圍山遶
訖名一小千世界數小千復至一千鐵圍山遶訖名

為中千世界數中千復至一千鐵圍山遶訖名為大千世界其中四洲山日月乃至有頂各有萬億成則同成壞則同壞總名三千大千世界號為娑婆世界又名索河世界

日繞須彌山半常行不息南閻浮提洲日正中東弗于逮洲日始沒西瞿耶尼洲日初出北鬱單越洲正夜半閻浮提洲人所有西方瞿耶尼洲人以為東方鬱單越洲人所有南方弗于逮洲人以為北方

大地厚四十八萬由旬邊廣無量水輪厚六十萬由旬邊廣無量風輪厚三十六萬由旬邊廣無量大海

最深處八萬四千由旬須彌山入海中八萬四千由旬出海水上亦八萬四千由旬山根從地上升去地四千由旬遶山縱廣一萬由旬山頂縱廣八萬四千由旬其中平可居四萬由旬日道在須彌山半四萬二千由旬日宮殿縱廣正等五十由旬月宮殿縱廣正等四十九由旬日月方圓五百由旬一曰八萬四千里大星圍十八拘盧舍一曰七百里中星十拘盧舍一曰四百八十里小星四拘盧舍一曰二十里天圓廣南北二億三萬三千五百里七十五步東西短減四步周六億十萬七百里二十五步從地至天一

億一萬六千七百八十一里半下度之厚與天高等

一云周天一百十萬里上下四方徑各三十六萬里
六尺為步二尺為肘四肘為弓二弓為一丈六尺二
百一十六丈為一里五里為一拘盧舍八拘盧舍為
一由旬古數十萬曰億秦制萬萬曰億

伏羲氏盡地之制凡天下山五千三百七十居地五

十六萬四千五十六里出水者八千里受水者八千

里出銅之山四百五十七出鐵之山三千六百九

劫有四種一別劫二成劫三壞劫四住劫別有六劫

一別劫二成劫三住劫四壞劫五空劫六大劫一大

劫中又具成住壞空四劫劫何為量曰有如全段石

山百年一拂山已磨滅此劫未終又曰堯率天人一

百年以六銖衣一拂至石銷盡為一劫

小劫初飢饉劫次刀兵劫次疫病劫二十小劫為一

劫四十小劫為一劫六十小劫為一劫八十小劫為

一大劫不殺戒以免刀兵災殷淨心以免疫病災施

食衆生以免飢饉災

莊嚴劫壞交賢劫未來劫曰星霜劫初閻浮人八萬

四千歲身長八丈過百年命減一年身減一寸如是

遍減至十歲身長一尺則減劫之極也爾後復入增

劫凡遇百年命增一年身增一寸如是遍增至八萬

四千歲身長八丈則增之極也一增一減共一千六

百八十萬年名一轉輪切凡二十轉輪共三萬五千
六百萬年為一成切自成切之後交住切已經八減
八增今當第九減切已得一萬四千二百七十九萬
三千年也此去更過七千年為減切之極復入第九
增切

四千五百六十年為一元大數之終四百五十六年
為一小元數之終陽厄五陰厄四陽為早陰為水初
入元百六十年有厄故曰陽九百六之會出漢書註
一元之數卽一歲之數一元有十二會三百六十運
四千三百二十世猶一歲十二月三百六十日四千

三百二十辰也前六會為息後六會為消卽一歲之
自子至己為息自午至亥為消開物於星之七十六
猶歲之驚蟄也閉物於星之三百一十五猶歲之立
冬也一元有十二萬九千六百歲一會有十二萬九
千六百月一運有十二萬九千六百日一世有十二
萬九千六百辰一日自子至寅為曉自戌至亥為夜
由大撓作甲子遯之子天開丑地闢寅人生自開闢
至我明嘉靖辛亥一千一十五萬五千四百六十
八年

渾沌開闢有始乎曰無始有終乎曰無終不有渾沌

孰有開闢不有開闢孰有渾沌是以開闢之始渾沌
之終也渾沌之終開闢之始也不有第一開闢乎曰
一氣而已必有漸焉莫能紀之而莫從信之也
天地久矣曷經歷之曷言之傳之也曰神聖心具
通洞見無始不聞昆明劫灰西域至人能知耶烏可
混目睫之近而併廢萬劫之變也
世界之大中國亦小矣歷劫之遠百年至近矣關疆
廣產而深為後計者不一省哉

補衍卷一完

補衍卷二

海鹽沂陽王文祿世廉

邃初大聖篇

粵誕至人分別二儀建極作則裁輔攸宜聽聆元聲
觸類先知神妙無方三才乃歸補邃初大聖
開闢後光音天人誕降大聖曰渾敦氏即盤古氏初
天皇氏也龍首人身神靈一日九變一萬八千歲為
一甲子荆湖南以十月十六日為生辰有初地皇氏
初人皇氏

中天皇氏號曰天靈姓聖名獲頌贏三舌驤首鱗身
碧盧表揭歲紀攝提靈書八會提名旋復出桂州無

外山一姓十三頭平初紀元年一萬八千歲地皇氏
岳姓名鏗馬蹠妝首出熊耳龍門山一姓十一頭太
始紀元年一萬八千歲人皇氏即泰皇氏一曰居方
氏姓愷名胡洮龍軀驤首達腋出刑馬山提地國一
姓九頭太平紀元年一萬八千歲自人皇氏後有五
龍氏兄弟五姓人面龍身並乘龍上下治五方司五
類攝提五十九姓即九皇氏沒六十四氏興六十四
氏沒三皇興六十四氏蓋併五姓三皇乃合維三姓
教人穴居乘蜚鹿以理連通六姓乘蜚麟以理敎命
四姓駕六龍而治

循蜚二十二姓鉅靈氏出汾睢驅陰陽及山川或治
蜀蓋迹躔云句疆氏譙明氏涿光氏鈎陣氏黃神氏
出天參政三百四十歲狇神氏出長淮三百歲五葉
千五百歲犁靈氏大騮氏見南密鬼騮氏後有鬼氏
饒氏攘氏刹氏弁茲氏泰逢氏出蒼山陽冉相氏得
環中以隨成蓋盈氏出若水禹中大敦氏雲陽氏是
為陽帝處長沙巫常氏泰壹氏是為皇人神農黃帝
老子皆受道要有兵法雜子陰陽雲氣黃治泰壹之
書空桑氏出交鹵神民氏都神民丘三百歲倚帝氏
都倚帝山次民氏是為次是民次是民沒元皇出穴

處之世終矣總六十餘世

因提十三姓辰放氏是為皇次屈渠頭四乳出地郭
教民揆木茹皮以禦風霜緇髮闔首以去靈雨咸從
曰衣皮人治二百五十載四世蜀山氏始蠶叢柏獲
魚鳧各數百歲號蜀山氏歷傀氏後有歷氏傀氏并
蜀山氏六世渾沌氏是為渾敦後有渾氏沌氏屯氏
七世東戶氏十七世皇覃氏一曰離光氏兌頭日角
格云鳳皇出地衡治二百五十歲七世啓統氏三世
吉夷氏後有吉氏四世八遽氏一世豨韋氏四世有
巢氏棲石婁顏樓木末為巢教氏巢居以避物爪牙

角毒號大巢氏治三百餘載二世遂人氏出不蜀冥
城游日月都至南垂感木火仰察辰心作鑽燧教民
火食曰燧皇治律高石室二百三十載四世庸成氏
出群玉山平阿無隘四徹中坦冊府所在庸成是立
故號庸成氏有季子性淫放之西南儀馬產子身人
而尾蹄馬是為三身國八世總六十八世

通禪十八姓倉頡氏一世栢皇氏二十世中央氏四
世大庭氏五世栗陸氏五世麗連氏十一世軒轅氏
三世赫胥氏一世葛天氏四世宗盧氏五世祝融氏
二世昊英氏九世有巢氏七世朱襄氏三世陰康氏

皇山 甫行卷三 吉虎

二世無懷氏六世伏羲氏二世神農氏三世總八十
八世

伏羲神農以下載諸易繫黃帝顓頊帝嚳以下載諸
史記唐虞夏商周載諸尚書大聖功烈著矣人咸習
聞以故不著于篇云補者補逸也物忘土魚忘水人
忘前聖可乎鴻濛雖荒邈矣古猶今今猶古也特久
斯忘耳悲夫子猶懼後之忘今也噫

五德主運篇

陰陽消息五氣布行生剋制化損益因更迹應萬有
一元穆清泥則厭勝通斯孔貞補五德主運

覺明空昧相待成搖故有風輪執持世界因空生搖
堅明立碍彼金寶者明覺立堅故有金輪保持國土
堅覺寶成搖明風出風金相摩故有火光為變化性
寶明生潤火光上蒸故有水輪含十方界火騰水降
交發立堅濕為巨海乾為洲渾彼大海中火光常起
彼洲渾中江河常注水勢劣火結為高山是故山石
擊則成焰融則成水土勢劣水抽為草木是故林藪
遇燒成土因絞成水

木火土金水是為五行其神謂之五帝古之王者易
代改號取法五行五行更王始終相生亦象其義也

五行用事先起于木木東方也屬巽巽為風萬物之初皆出焉是故帝王則之首以木德王其次則以所生之行轉相承也所尚則各從其所王之德次焉

天皇氏木德王地皇氏火德王人皇氏土德王太昊伏羲氏風姓木德王是為春皇女媧氏亦木德王共工氏水德王炎帝神農氏火德王黃帝軒轅氏土德王少昊金天氏金德王顓頊高陽氏水德王帝嚳高辛氏木德王帝堯陶唐氏火德王色尚黃帝舜有虞氏土德王色尚青夏后氏金德王色尚黑殷人水德王色尚白周人木德王色尚赤秦水德王色尚黑漢

火德王色尚赤魏土德王晉金德王隋火德王唐土德王宋火德王元水德王我 明土德王上接唐虞中天之數云

乘土王世五十數千年乘金王世四十九數九百年乘水王世二十數六百年乘木王世三十數八百年乘火王世二十數七百年自黃帝至漢五運適同

或曰五行人間用物六府增敷木類耳于支甲子紀時非可配生剋也素問五運六氣泥哉予曰誠然每仰觀五星初昏即見五色朗然不亂是五行之精也古今不改罔可偽為則五行不可誣然五德運因天

曆數攸值耶

惟迂之變篇

乾坤浩渺塵妄紛糾倏忽呈沒曷明曷幽萬變恒常
浚索徒併各實匪異異見相仇補迂惟之變

須彌山頂三十三天總名忉利天帝釋所居一級堅
手天一級持華鬘天一級常憍天一級日月星宿天
山半四天王天從山升虛空有地如雲焰摩天兜率
陀天化樂天它化自在天魔身天以上名欲界梵衆
天梵輔天大梵天少光天無量光天光音天少淨天
無量淨天徧淨天福生天福慶天廣果天無想天無

煩天無惱熱天善見天善現天阿迦賦吒天以上名
色界空無邊天識無邊天無所有天非想非非想天
以上名無色界去須彌山一千由旬大海下四面阿
修羅城海水上高萬由旬空居夜叉宮火災起至光
音天為際水災起至遍淨天為際風災起至廣果天
為際人民行善劫壞命終生光音天十四天以下皆
壞天人命終皆集十五天上

四大洲及八萬小洲諸餘大山及須彌山外別有輪
圓山山外更有一重大輪圓山兩山間極大黑闇有
八大地獄活大地獄黑大地獄衆合大地獄叫喚大

地獄大叫喚地獄熱惱大地獄熱惱地獄阿毗脂大
地獄八大地獄各有十六小地獄黑雲沙地獄糞屎
泥地獄五叉地獄飢地獄渴地獄膿血地獄一銅釜
地獄多銅釜地獄疊磴地獄斛量地獄雞地獄灰河
地獄斫板地獄刀葉地獄狐狼地獄寒氷地獄更有
十地獄頰浮陀地獄泥囉浮陀地獄阿呼地獄呼呼
婆地獄阿吒吒地獄搔捷提迦地獄優鉢羅地獄波
頭摩地獄奔茶梨地獄究牟陀地獄從閻浮提向下
二萬由旬是無間地獄又向下一萬由旬是夜摩世
間地獄向上四萬由旬是四天王天若地獄罪畢亦

生天上若罪未畢或遇劫壞復移它方無日月星宿
無晝夜唯有大冥謂之火劫

貪物罪畢遇物成恠鬼貪色罪畢遇風成魃鬼貪惑
罪畢遇畜成魅鬼貪恨罪畢遇蟲成蠱毒鬼貪憶罪
畢遇衰成厲鬼貪傲罪畢遇氣成餓鬼貪罔罪畢遇
幽成魘鬼貪明罪畢遇精成魍魎鬼貪成罪畢遇明
成役使鬼貪黨罪畢遇人成傳送鬼

恠鬼報盡生為梟類魅鬼報盡生為咎徵類魅鬼報
盡生為狐類蠱鬼報盡生為毒類厲鬼報盡生為蛔
類餓鬼報盡生為食類魘鬼報盡生為服類魍魎報

學山 卷二
盡生為應類役使鬼報盡生為休徵類傳送鬼報盡
生為循類

梟倫生人中頑類咎徵生人中異類狐倫生人中庸
類毒倫生人中狼類蛔倫生人中微類食倫生人中
柔類服倫生人中勞類應倫生人中文類休徵生人
中明類循倫生人中達類

堅固服餌不息食道圓成名地行仙堅固草木不息
藥道圓成名飛行仙堅固金石不息化道圓成名遊
行仙堅固動止不息氣精圓成名空行仙堅固津液
不息潤德圓成名天行仙堅固精色不息吸粹圓成

名通行仙堅固呪禁不息術法圓成名道行仙堅固
思念不息思憶圓成名照行仙堅固交遘不息感應
圓成名精行仙堅固變化不息覺悟圓成名絕行仙
是等人中煉心不脩正覺報盡還來散入諸趣

每一劫有一佛出世今入第九劫劫成人年一百歲
時釋迦文佛出世後至戒劫之極復入第九增劫漸
增至二萬歲時鐵輪王出世此增劫之極也復入第
十劫劫至八萬歲時彌勒下降是時閻浮真金為地
地平如掌杭稻自生男女五百歲方婚嫁所有一切
世界皆具衣食自來快樂無量

鬱單越洲人粃米不種自生無糠糲如白華聚取擲置自然釜鍤有摩尼珠名焰火置釜底自然出焰飯熟焰滅有來食者恣食之主不起飯終不盡主起飯盡有曲躬樹葉葉相次華香果繁天雨不漏棲宿其下大小便利地自開拆便利已地自合欲心起時熟視女子隨逐往詣園林若親屬樹枝不垂葉卽萎黃枯落各自散去若非親屬樹枝垂覆葉茂蔭映華開鮮榮牀敷皆具乃成夫婦至懷妊七日八日生男若女置通衢而去行人經過出指含味指出甘乳竟遍見身過七日已其兒長成與彼人等男向男伴女

向女伴相逐而去命終不相哭泣莊嚴死尸置通衢有鳥名憂慰禪伽接去山外

大三摩多王有夫人多慾與驢交生子頭耳口眼皆驢唯身類人駁毛被體夫人驚怖棄投廁中處空不墜有羅刹嬪名驢神接取往雪山乳哺長成教服仙藥與天童子遊號佉盧虱吒驢唇大仙學聖法六萬年安置日月年時大小星宿五星日月荷邏候為八大星小星二十八宿以昴為先後有伽力仙別置星宿大小月法以角為先常明星百二十四可名星三百二十為星二千五百微星萬一千五百二十

世有專作惡邪見命終向下惡趣墮地獄中有行善
正見命終向上善趣生人天中是以痴蠢為牛慳貪
為狗嗔怒為蛇凶暴為毒龍猛烈為虺虎一切皆心
造定矣奚待命終乎善惡之機早辨之可也
大道茫茫包羅靡外目不及覩悉疑恠迂蕭丘寒焰
溫谷湯泉浮石之山沉水之木絃膠火布曷信之宇
宙大矣遠矣豈可泥焉盡無邪故曰變卽常也不覩
疑之也聊述此篇以發例云

補衍卷二完

